

## Temp da Nadal intensiv pels ospidals a Scuol e Sta. Maria

**Tanter Festas e Büman han trattà ils meidis da l'ospital regional a Scuol tschinch pertschient daplù cas co l'on passà. Ils blers, nempe 281 paziants, han pudü gnir trattats da maniera ambulanta.**

«Da las relaziuns externas nu craja chi haja dependü cha nus vain gnü ingon extraordinarainc bler da far d'urant il temp da Nadal e Büman», disch il meidi Joachim Koppenberg. El es directer da l'ospital a Scuol e dal Center da sandà Engiadina Bassa. Il meidi suppuona plüchöntschi chi haja da chefar culla quantità da giasts illa regiun co cullas relaziuns sün pista: «Quellas d'eiran bunas e l'ora es eir statta bella, ma causa cha'ls dis da Nadal d'eiran quist on precis d'immez l'eivna sun blers giasts rivats in nosa destinaziun fingià als 21 december.»

### Bleras feridas da las extremitats

Ils meidis da l'ospital han trattà dals 24 december fin als 6 schner 381 paziants, «281 da maniera ambulanta e'l rest staziunarmaing.» In congual cun l'on avant correspuonda quai ad ün augmait da s-chars tschinch pertschient. Alch plüchöntschi nouv es, sco cha'l meidi disch, cha relativmaing blers paziants svizzers ch'is fan mal in Austria, «per exaimpel sül territori daskis ad Ischgl vegnan svolats cun l'elicopter a l'ospital a Scuol». Quai s'ha müdà tenor el avant duos, trais ons: «Plü bod vaivan ils respunsabels da las firmas d'elicopter austriacas l'impreschiun chi nu possan svolar cun paziants in Svizra, causa cha quel pajais nu tocca pro l'UE.» Ch'intant s'haja pudü sclerir quai, da maniera cha paziants svizzers vegnan manats da l'Austria in ospidals svizzers sco quel a Scuol. «Els preferischan da gnir trattats in Svizra, quai es eir plü simpel per quists paziants.» Sco cha'l meidi Koppenberg declera s'han las feridas dals paziants as müdadas ün pa i'ls ultims ons: «Ingon vaina gnü bleras feridas vi da las extremitats sura dal corp, sper las feridas classicas sco fracturas da chommas haja dat extraordinarainc bleras feridas da la spadla e da la part sura dal bratsch.» Il motiv sarà, sco ch'el sup-puona, ils skis da carving, «cun quels s'esa in gir adüna plü svel.» Nouv a l'ospital a Scuol esa stat quist utuon cha meidis e personal han gnü bler da far eir fingià avant la stagiun ota: D'urant il temp tanter las stagiuns, in settember, october ed impustüt in november, d'eira l'ospital occupà extraordinarainc ferm. «D'urant quist temp tanter las stagiuns vegnan per gronda part indigens per trattamaints, operaziuns planisadas», explichescha il directer Koppenberg, «id es fich allegraivel cha quai s'ha augmantà i'ls ultims ons.» Quist augmait ha influenzà eir la media da paziants trattats d'urant l'on 2018: «L'on passà vaina pudü trattar da maniera staziunara 18 pertschient daplù paziants co da l'on 2017», constata Joachim Koppenberg.

### Bler da far eir in Val Müstair

«Dals 24 december fin als 6 schner vaina gnü blers cas urgiants in nos center a Sta. Maria», disch Judith Fasser chi maina il center da sandà regional. Quel ha suot seis tet ün ospidal, üna partiziun da chüra, l'organisaziun da salvamaint, üna pratcha da meidi e l'organisaziun da la Spitex. «D'urant quists dis d'eiran occupats duos meidis plainamaing, ils blers cas hana pudü trattar da maniera ambulanta», cuntinuescha ella, «cas chirurghs haja dat be pacs e pitschens, ils blers d'eiran internistics, medicinics.» Cha'ls meidis hajan trattà impustüt infects, grippa, puoncha ed eir ün infect plü grond in ün ögl d'üna turista. Transports da salvamaint haja dat be duos: «Quai es pac in quist temp d'ota stagiun, la radschun sarà la bella naiv sü Minschuns, il privel da's ferir cun dar giò nu d'eira uschè grond», disch la directura dal Center da sandà Val Müstair. Impiegats da quel sun stats preschaints cun duos ambulanzas a Büman d'urant il Tour de Ski a Tschier: «Eir qua nun haja dat ingüns cas plü gronds, be ün pèr bagatellas.» (anr/fa)



**Il meidi Joachim Koppenberg es directer da l'ospital regional Engiadina Bassa a Scuol e maina eir il Center da sandà Engiadina Bassa.**

fotografia: Flurin Andry